

四庫全書

集部

欽定四庫全書

安雅堂集卷十二

元 陳旅 撰

志銘

丘同知墓志銘

丘氏齊太公後太公封于營丘支子用邑為氏晉宋以來代有聞人譜牒已不可攷其世次在趙宋有為陳留令者因家陳留有子三人從高宗南遷其季子處台州

三世為璫始家錢塘璫生次山以承信郎領漕薦屬宋
亡不仕次山生世良字子正是為松江府君幼穎悟讀
書過目輒解年十二喪父二兄分遺貲去君奉母張夫人
以居日益貧無以為養教授錢塘市中經傳子史百家
之言靡不蒐究士大夫咸願與游稱其學行之兼懿也
于是集賢院薦之于朝翰林學士徐公子方閤公子靖
又薦君與元君復初皆宜編修國史君獨嘆曰吾不過
欲得祿江南以養母耳餘非所願也宰相聞而念之奏

為海鹽州儒學教授學久壞土田奪于張宗人服君德
教相戒勵唯恐教授不與乃復田千餘畝又大修孔子
廟秩滿除杭州路教授杭為東南大會府省憲臨其上
而四方游士之所集也為教官者易得誦上下君與教
時若左丞許公敬臣廉訪使修公伯起皆待君如平生
士亦無敢訕議既代授將仕郎慶元路總管府知事君
所定文牘吏不得舞文法為姦利監郡者擅權貪勢以
君持律令志不得逞走帥聞愬知事抑已帥曰若所為

微知事民不聊生方議責若若顧憇人邪亟往謝知事
其人慚服故終君為僚時得不敗後竟以贓罷郡倉歲
畜米以輸京師船人入倉廢法用量所贏十五六是歲
有一倉所畜米黜腐郡守以下咸懼曰破家不足庚奈
何君計之曰若節其贏則不至用此即往見海運官曰
先時官來縱船人大取贏去唯所欲用是暴民膏血而
擾國家者何福以堪且人行天險中平生乃克濟耳
海運官惕然戒船人毋取贏黜腐米固不用至治中賦

江南包銀帥間以慶元賦委君定之君分戶為九等止
科其上者而已行省使者以賦簿峻責之君曰民困賦
役今又科包銀如是亦足矣吾以一身為一郡民請命
其亦可也卒不增時太夫人年九十餘居南湖之上日
具酒為歡娛達官顯人亦時與君為太夫人壽俄丁內
艱哀毀不自堪以喪還杭制終調杭之於潛縣主簿于
潛豪民多閑令甲以主簿儒者聚縣廨觀之君聽訟明
決誦律如流水豪皆驚嘆不復敢梗縣政攝縣昌化以

至陞承事郎為集慶之江寧尹皆以嘗施于潛者而施之于是君老矣居二年請老于朝進奉訓大夫同知松江府事致仕推恩追贈父某官母某縣君妻潘氏封某縣君至元三年丁丑歲二月丁酉以疾終年六十九子男二人長曰茂廢授温州路樂清縣尉次曰芝女二人長適吳江州稅務大使呂文矩次適吳興費元禮孫男一人申孫其年三月甲寅薨錢塘縣方家峪先塋之次君聰明粹溫行正而通與人交終始款懇心不宿怨能

急人之急自壯至老無一怨之者居家平易和樂外因
官事而妻子不知仕宦四十年未嘗營產業為文不事
艱險善為詩尤善長短句有梯雲集六卷隨筆二卷初
同郡潘翁有女富人求之不與一旦見君以為宜壻家
人言其貧翁曰丘生今貧後富貴竟妻之君果以文學
發身官至五品夫人得為封君潘翁亦知人哉余聞古
之仕而已者則歸教其里使子弟有所受以為善先王
治化之所以盛也君以善道著乎鄉雖庸夫孺子亦敬

而愛之故余于其致仕而來歸也以賓禮延致郡學將
使學者接見其風猷而有得焉而君遽即世矣茂以狀
泣請于余曰子實知先人願得銘刻于墓石余誼不
得辭乃為之銘曰

德足以範俗才足以綜治老于鄉邦猶足以淑夫子弟
則雖縣車于門未嘗不行其志嗚呼今人逝矣過其墓
者尚慨歎而興企

汪先生墓志銘

汪先生諱斗建字昌辰建德淳安人曾大父諱某大父諱某父諱某母某氏先生個儻有奇志幼時出言輒過人長益挺然欲以其才譎自見于世從祖諱某由錢塘知縣以至為大理少卿常挈以自隨牒試國子監名在前列方襄樊受圍賈似道專國玩兵不即募凡在朝者不唯不敢言乃更相為諂阿以為周公復生遂比當時為成周隆平之世似道于是愈不欲人言襄樊事時先生在京學率同舍七十人伏闕上書極言國勢阽危上

流不可不急援也書上十日不報遂拂衣還故丘至元
內附之後亦未嘗有榮進之意乃東遊會稽探禹穴因
汎覽金華鴈蕩諸山以至于海悠然賦詩有覆塵之思
焉聞故宋尚書方公逢辰講道于淳安之石峽則歸從
之游以大有得于義理之學既而典教鄉校士論翕然
稱之又教遂陽三載遂不復仕唯家居教授學者日接
其風猷有以善其鄉俗先生神鑒奕朗長髯垂膺酒酣
言論忼慨激烈雅好鼓琴時為客作離騷數曲清聲抑

揚聽者悲憤猶有屈平哀郢之心焉泰定丙寅七月某
日卒年七十二娶趙氏子男一人孟文孫男一人汝懋
曾孫男一人某天厯己巳十月某日葬于某里某山先
塋之次以趙氏祔余備官錢塘孟文使汝懋來徵墓銘
余讀其狀而嘆曰詩云民雖靡盬或哲或謀或肅或乂
當宋之亡也猶有譽譽諤諤如汪先生者乎乃為之銘
曰

道有勿行則教于其鄉言有勿通則寫于孤桐志氣有

勿宣則放蕩于山海之間嗚呼今其已矣後人之聞其
風而興起矣

鄭君瑞墓碣銘

余官江南時天台葉伯禮為余言其鄉鄭君瑞先生因
其所居號曰雲南既即世其子作望雲之樓以庶幾遊
魂之來歸也余聞而憐之為賦詩以慰其無窮之思至
元再戊寅之春余入京時伯禮亦來持君瑞壙誌言于
余曰此其子光祖等所自述者以卜葬日薄不得請銘

于士林之望懼先德之泯焉而勿章也敢請于下執事
惟終憐之按誌君諱德鄰君瑞其字也世為台之臨海
人曾祖諱莊祖諱宗明皆畜德勿施父諱良顯個儻有
宏才宋末都督府聞其名聲辟授進勇副尉又授承節
郎時事已不可為矣皆辭之家積貲能散與其族鄉人
高其誼君瑞生有美質雅尚冲素好黃老言既壯欲盡
棄人間事專以鍊形葆真為務乃戴道士冠衣道士衣
謂人曰我道士也彼紛紛然者毋吾友也俄而總道家

教者得其姓名署為黃巖道正又署慶元道判則皆曰
吾無所逃夫紛紛者乎吾亦姑為之而已矣久之嘆曰
所以為道士者將以全吾天也勤我以職掌則喪我多
矣遂并棄道士不為自營其墓于黃山貴人之峯而築
室于其山中以居日取儒者之書而觀之洒然有得則
曰名教中誠有樂地吾又何之乎至治三年十一月甲
午以疾終年六十有三臨歿戒其子曰我死必以深衣
斂得正而斃幸也先娶柯氏早卒繼郭氏又先卒君瑞

天性純孝平居與人言每及推歲侍親時事則嗚噎流涕孺慕蓋終身焉所娶郭氏姑女無男兄弟惟有一姊其母不欲置後中分其產以畀二女君瑞曰烏可使吾外舅為若教氏之鬼乎竟為置後以其妻所得之產歸之郭祀得弗墜其薦義槩若此子男四人光祖夢賚郭氏出也全易家慶庶出也女五人一適盛賜道一適鄔與褒孫男一人女四人君瑞所自營墓在黃巖州善化鄉葬之日泰定元年十二月庚申也余謂道家宗黃老

以為教黃帝制法立極老子為王官有妻子皆未嘗離
世俗絕去倫類而後世道家者流則異是矣君瑞真能
宗黃老之道者哉既而反初服以儒自終則又卓乎偉
矣乃為之銘曰

種文王以為樹其材不中乎梁柱藝朱草以為田孰若
黍稷之食人幸白日之未夕出雖遠而亟復禮為輿樂
為馭纁黃為期以即夫中路貴人之峯其下鮮原生而
游歿而安以利其子孫

趙縣尹墓志銘

越有君子曰趙公諱由鍾字子元歿之明年其孤宜溥
等治窆宜浩來錢塘以政和主簿胡一中所為狀見
旅于寓舍再拜垂泣以銘請一中郡人又宜浩同年進
士其言足徵旅既不得辭乃述其家世德義之著者而
銘之按公狀十三世祖故宋燕懿王五傳為楚孝節王
靖康中由浚儀南遷遂居越之山陰曾祖考少師開府
儀同三司吉國公諱希迴祖考率府主管佑神觀贈和

州防禦使諱與湛考秉義郎諱孟珙曾祖妣楚國夫人
王氏唐國夫人胡氏越國夫人余氏祖妣令人妣恭人
皆余氏公天質醇正生十年而宋始亡當為宗室近屬
時能靜約若韋布家兒既內附頗飭厲問學弱冠遊縉
紳間行省大臣美其才欲尉薦而官之則辭曰吾學未
堪官也歸侍秉義公鑑湖之上而相其治生則又以為
綸裘之餘勿敢猶自肥也贊其父捐二頃田與郡學一
頃與縣學初宋相史公浩起義康越中給死喪不能舉

女不能嫁者至是公又贊其父以田二頃入義康里人
困于役又以五十畝充義役父子義聲日聞于是朝廷
旌其門曰義士趙氏之門及公顯家政貲產益落能甌
勉振恤族里族孤女無以為行則為擇配而貲送之鄰
女若是者亦助之歲大侵吏督民買鹽亟徵其錢榜笞
無空日則罄私橐代輸焉每歲夏秋艱糴之時出粟貸
民踰期還者亦不取贏以物易粟則酌以倍直以力食
者則酌直倍力里人服其忠厚有怨爭者不之有司詣

公質曲直得一言即釋忿去平居以禮法自將雖盛夏
必正衣冠端坐家庭肅如與人交敦道誼重然諾終身
不少變若公者亦可謂之君子矣中歲趣遫澹恒杜門
以自遠鑿巖結屋集泉為池有樓曰聽松有亭曰秀野
勝日輒治具與所善者相歡樂人慕其雅致云方科目
未行越之學者蓋寡公聚書教子躬致厚幣迎師數百
里外蚤作課諸子學夜分不休如是凡廿餘年每聞書
聲則喜曰此吾所以遺諸子也且語之曰毋但工文辭

沈潛理義而蹈迪矩度此汝所以為學也從子之無父
母者亦撫而教之曰吾與汝財不若勉汝以學汝得財
不過適口體之欲學成則所立者大也奉定丁卯公第
三子宜浩登進士授昌國州判官再調處之慶元令以
俸錢百緡為公壽公為書還之曰汝為吏當廉以盡職
縣無公田乃以俸錢奉我將無以自給寧不貽親憂乎
其教子類此仍改至元之二年丙子公壽七十以推恩
授從仕郎慶元路象山縣尹三年丁酉四月十七日終

年七十又一里人哀思不忘娶唐氏故宋叅政質肅公之孫女先公三十六年卒追封宜人子男五人宜溥宜溫宜浩宜浚宜溥皆善學宜浩今官徵仕郎江西等處行中書省管勾兼承發架閣女一人早卒孫男才二人棧模榧榧棣楠枋梓樟檟槃女八人至元己卯月日公與宜人合葬于山陰項呈之原孔子論詩至殷士膚敏之章而興嘆焉蓋悲夫富貴之無常也公世所憑藉為富貴者既失之矣顧今所居乃有桓表傑然屋室榮

潤宜浩以科第起家仕宦顯諸子又皆樹立而公優游
鄉邦食其先疇老于山水園林之間身及爵秩以壽考
終何所憑藉而至是哉亦為善而已矣嗚呼善之可以
憑藉也久矣銘曰

孰不築室我以德宅孰無高門我以義闢不恃物以為
存則所存者不亡不嗇施以為富則所積者益豐象山
崇崇命服孔陽嗣前人光貽後人之慶

劉程甫墓志銘

慶元之奉化有鄉曰連山劉氏族聚廿餘家世皆讀書力田至曰三聘者乃語其諸子曰術業不可以不專也有能專志讀書光吾宗者乎其子天驥感其言取六籍日夜讀之四書朱氏傳資治通鑑韓退之柳子厚文章皆手抄下逮醫藥陰陽家書莫不蒐討人服其博洽然頗信術者之說年四十餘無子顧族子無可後已者適其姪蕭氏之子生推其六物以為可承家也亟請于父求蕭氏之子為子而名之曰圖南圖南字程甫生三曰

即育于劉氏天性純孝自為兒童時見其父手抄之書
非鹽手不敢取讀讀必成誦大父病甚以柘漿漬乾梅
啖之下咽輒吐與諸孫食他孫皆不食獨程父受而食
之大父嘆曰是真吾孫也而父言是也既長益力學試
進士不利妻族大夫以恩奏授祕書省校勘則慨然曰
士不自樹立而緣妻以得官非美也辭不授又試有司
得待補國學士而宋亡矣我朝準前代役法推貲產之
殷者為里正以趨走其里之事程甫為里正時人心猶

未定反覆狂悖觸死罪連坐者衆程甫因役得在官力
辨無辜民不當死北來官人見程甫顏魁梧又詞氣忼
慨義其言而從之至元己丑薦饑盜起旁郡縣奉化愚
民從而動者亦數百人首惡既誅而連山多厚林深谿
民與他邑人多匿其中官軍窮亂者黨與將大搜使程
甫為鄉導程甫因具酒款官軍乘肩輿先行見民携持
而狼顧者輒教避去既而議者以逋民之不盡獲也欲
悉燬其室廬則又請于帥曰民飢借賊勢謀食耳初非

叛者麥令且熟人思復業若使之無所於歸是驅之為盜也帥悟而其屬皆不可程甫計此曹非賄不足以動其心乃買腴田百畝購金幣徧賂其人事遂寢于是里之老者召其子弟而告之曰吾等仍有室廬以蔽風雨劉君之賜也宜合錢以庾其田程甫聞而止之曰吾樂為此願勿復言也凶歲富室幸穀貴更為小量賣之程甫則大其量以乞糴者里有爭者來求直則為曉法又舉酒勞解之凶暴乘搶攘時為民害閭閻多事治邑

者往往藉程甫為助里役既代屏居不復預邑中事延
師教子樹花竹以玩生意每對酒賦詩又喜歌楚詞以
寫其憂悵云某年月日以疾終年六十母同里葉氏蕭
氏母之姊也久病痿痺程甫未嘗去左右不得已出應
門戶必躊躇移時而后能出居父母喪哀毀踰節以能
子稱娶寧海胡氏都倉某之女有嬀道程甫好義胡氏
每相成之子男四人應祥景元戊伯振之應祥戊伯已
卒女一人適胡元木孫男五人子東子榮子明子青子

順女二人程甫墓在某鄉某山之原葬以某年月日景
元有經學工文辭與余雅游泣而言于余曰先人行誼
幾于古之聞人而景元不能致先人有聞于世且老矣
子史官也幸憐而銘其墓乃述其狀而為之銘曰
連山之雲細縕輪困出而為雨以膏乎廣野君子畜德
亦以澤物施于其后矧有位秩至于排難解紛喪其良
田又何愧乎魯仲連之為人

陳如公墓志銘

公諱恕可字行之一字如心惟陳氏由潁川居光州之固始五代間有諱檄者避地閩中仕閩為太尉子孫散處它郡宋開寶初諱春者徙温州遷台州春與古靈先生襄皆太尉後紹興中公之高祖忠簡公始自台來會稽居焉忠簡諱騏仕至知樞密院事曾祖諱愿孫監西京中岳廟贈金紫光祿大夫祖諱綺尚書戶部侍郎以宣奉大夫寶章閣待制致仕考諱紹荀奉直大夫知英德軍府事妣李氏封宜人參政莊簡公光之孫女也公

幼即雅飭好讀書年九歲英德公卒于官哀毀如成人
與母護喪以歸甫禫母又歿大父憐其孤苦鞠而教之
使受業陳暨先生治尚書有聲以祖廕補將仕郎既而
大父登法從當仕孫京扶公辭之曰今改奉承務郎則
舊澤廢夫恕可寧淹選資乞以京扶任從弟當可為兩
得也大父喜而從之咸淳十年中銓試授迪功郎泗州
虹縣主簿覃恩予從政郎江南內附之後頗樂閒曠卜
居錢塘西湖之上與寓公遺老徜徉山水間若將終身

馬至元二十七年以故宋太學為西湖書院行省起公
為山長主之謝不就憲使徐公琰來見嘆曰信哉表師
之有在也強之而後就元貞元年以嘉興之崇德縣為
州公首被命為州之儒學教授後又為廬州路儒學教
授為衢州路江山縣主簿為寶慶路總管府知事為松
江府上海縣丞年六十八告老以承務郎平江路吳縣
尹致仕公之來崇德也學故縣學委墮久弗治公興學
與新州稱士論黜之廬州廟學壞則更作之壯美最淮

石禮樂器不備則為制金木竹石匏絃土革之物學田
為強宗所有則復之得二十一頃有奇憲使廉公希貢
苟公宗道皆禮重之代歸大夫士祖餞百里外不忍舍
在江山時有傳妖賊將入境民驚走匿山谷中僚吏亦
且遯去公曰長民輕動民將焉恃乃獨坐于縣治令索
訛言者得數人撻于市民恃以安在寶慶時惟執律令
治文書不附上官人服其掾上海舊徵酒課無法貧民
苦之公視民田多寡為賦莫不以為便平生居官惟職

所當為者為之不喜干譽于人與同僚意不合則去持
家以約御子弟嚴而恩與人交久而益敬嘗語其子曰
士貴立身吾老矣猶凜凜焉惟恐墜先訓也學綜經史
達禮制詩文醇正近古小篆似吳興張有謝事十餘年
不弛舊讀雖老見古法書名畫猶能臨摹時對湖上兩
峰吟嘯自適以越中故宅面宛委山自號宛委居士不
忘鄉邦云仍改至元之五年正月二十八日終年八十
二臨絕神情不撓有哭公者曰若人者其生也循循焉

其死也休休焉門生蔣震孫狀其行曰公為人清介見
世之黜陟榮辱一不累其心則其仕也有元次山漫士
之風皆可謂能知公者矣公娶山陰趙氏故宋中大夫
直祕閣時彌之孫女先五十五年卒繼杭蔣氏子男六
人以成佳兒以威以盛以威以威以威以威以威以威
承公廕今授吳縣胥口巡檢女二人皆先卒壻西秦張
文在孫男二人傳衍傳衡女四人遺文有志言橐餘學
橐宛委永言古今率錄復古篆韻詞譜編目樂府補題

藏于家是年某月日歸葬山陰縣承務鄉華巖峯之原
以威等前期來請銘昔公與旅論先世譜牒蓋同出固
始故益敦同姓之好又每愛旅所為文去年冬來寓舍
曰子能為我為文章乎去則疾作且死猶使人道前言
嗚呼尚忍不銘公哉宋亡六十餘年故老盡矣有志于
史冊者嘗慮其事之寢久而無徵也公大臣家賢子孫
所聞既多又從祖父在朝身見前代儀章物度與其政
治得失之實可得而考証焉今又亡矣君子于是蓋有

文獻不足之嘆而追感疇昔情好之殷則又余之私悲也
銘曰有舒有容有數其文藹其風流公侯子孫或出
或處不喪厥守有若臨之師保父母老成無人曷徵遺
聞尚俟來者視銘茲墳

傅先生墓志銘

至元再元之正月晦日溫陵鄉先生傅公年八十六卒
于家旅時從國學出董江浙學事訃適至南何哭之越
五年其孤柱臣等寓書以先生門人連山縣尹劉與子

所為狀來請曰先君子將以今年七月望日葬南安縣
禮順里龍母山之原墓銘子宜為旅不敢辭也乃述其
狀與所嘗知者叙而銘之先生諱定保字季謨自號古
直其先光州人唐末有諱實者為威武軍節度招討使
始居泉州八子散處旁郡第二子曰居獻家南安者祖
焉八傳為龍巖主簿伸主簿生宣義郎思溫宣義生迪
功郎天麟迪功生貢士湟貢士婉洪氏生先生六歲通
大學論語大義少長有文名卯角領鄉薦尋丁外憂咸

淳辛未禮部奏詞賦第四知貢舉方公逢辰見先生驚
喜曰頃見所作意老于文場者乃英妙若是知全州莊
公彌明為鄉大家名人以其妹歸之時賈似道當國務
抑遏新進士以鄉試字蹟微異難之三年始令赴御史
臺覆試試中又俾後三年始得廷對同列皆鬱悒先生
曾不動心歸益肆志讀書以益茂其所學亡何似道僨
軍貶死臨安亦不守矣宋諸王東度浙江至永嘉將建
位號陳宜中丞相遂天除拜唯人所欲得有以是諷先

生則笑曰吾但禮部正奏名耳景炎之亡也都督親戚
又以是諷先生則又辭之大德初行省以薦者投漳州
路儒學正又辭洪夫人曰是學官也可不必辭矣于是
漳之諸生皆來迎至即以太極圖兩銘合而講之聽者
悅服凡三載所講人至今皆誦傳之再投福州路三山
書院山長居三月歸事洪夫人不更仕自溫陵受兵後
奉母寓城中貧日甚授徒為養能時時致甘腴以愉色
婉容漳之初環城冢墓皆發于兵傳氏族最蕃先生無

問疏戚悉封之年五十未有子居常怏怏洪夫人曰兒
勿憂冢中枯骨當有知也既而果得三子洪夫人年九
十見諸孫長大歿之年六十又幾猶過于哀毀至于喪
葬事鉅細必親至治二年以平江路儒學教授致仕受
命之日嘆曰吾少擢進士今老矣始服命服何不及吾
母未亡時因歔歔泣下終身不忘其親槩若此為人舒
緩而謹審常揭先哲教敬之言于坐右其講四書也尊
朱子成說而得會通之旨究極微妙而皆中正之論諸

經亦因儒先之言而數繹之不立異以為高不騁浮以

為博教人尚忠厚務實踐見

闕

薄者心愀然曰是何氣

質之未變也為文溫潤典裁

闕

語類劉

闕

夫詩律類陸

務觀遠近求文者日集其門雖倉卒醇應皆縝密有思

致賢郡守與名公卿之入南者無不即其廬而禮焉狀

言未嘗以非義干人不為矯厲斬絕之行神暢氣怡與

物無競可謂善言先生者矣我先人與外大父趙公皆

東南碩儒歲在辰巳外大父與先人連年歿旅無所問

學日從先生佩服教言所得多矣天厯中天子開奎章閣聘用儒雅旅以先王言于學士虞公公將薦諸朝以老疾不可強起而昔交者閩中道德文學之士蔚然盛矣數十年來縉紳老人祖謝殆盡先生之學雖不行于當世其鄉之學者尚幸老成典刑之有存也嗚呼今亡矣先生娶莊氏繼張氏皆前卒曰柱臣曰魁郎曰益庶生男也女適莊良孫孫男二女一有四書講彙詩文雜著如干卷藏于家柱臣郡學訓導娶凌氏魁郎閩清縣

儒學教諭娶吳氏皆克世其業云銘曰

維昔羣猷萃于閩中往者不返吾將焉從先生之存為
閩儒宗所不返者見于其躬先生之亡昔人與終尚爾
來者嗣茲流風

袁夫人墓志銘

杭之臨安有羅氏之賢母曰袁夫人識度明偉秉心制
行敦懋而不回蓋有烈婦人之風焉夫人豫章人父諱
某母某氏宋咸淳中夫人之夫某州司戶諱某既登進

士第侍其父通判隆興夫人實歸焉羅氏大族也其先
五代時自襄陽徙臨安擢科第者世有其人而曰少微少
章二先生者又以禮樂化鄉邑故臨安人多習禮表氏
遠來為是大族子婦人以為難而夫人一言一動必謹
禮節自少至老未嘗有侈肆之心其家賴之以為存
焉至元內附之初司戶之兄掠於吳兵欲得賄以刀環
火炙之賄不至則死夫人盡棄所畜相其夫抹出之未
幾通判公卒家益多故則又力相其夫持門戶備嘗艱

虞子曰汝錫其長曰鏐異母子也夙有廢疾兩臂不能得
屈伸則保而鞠之教而育之既為之娶則與司戶君言
曰資產薄不足以給二子鏐雖疾能承家矣寧令吾所
生者出家為道士可乎司戶服其誼遂俾汝錫入餘
杭大滌山從節尊師受業為道士司戶歿夫人治喪葬
悉以禮既而鏐與其妻皆歿鏐有三子二女則又保鞠
而教育之得曾孫又姁姁抱撫之羅氏以寡母綜家政
中更饑饉賦斂之窘廩不自支而男女婚嫁定窳蒸嘗

與夫族戚鄉閭慶弔饋問之禮固有缺遺四五年之
間內外無間言蓋能儉以處已慈以遇物而勤以集事
雖大耋精神不衰衣裳絲帛之工以至箕帚滌濯之賤
猶身親之故其家人無敢不飭勵者汝錫歲時歸覲則
必有以勉之且曰汝能念吾言猶在吾側也昔羅氏有
歧竹之瑞司戶兄弟生焉其徵為聯科至順庚午堂下
竹復歧適有詔高年耆德者旌其門人謂竹有慈姥之
祥子孫乃皆舉酒為夫人壽然于是春秋益高矣明年

諸孫有遠適者必戒之亟復其冬使人趣汝錫歸曰我
與汝為子母五十四年而我八十四矣母吾戀也又曰
我無雜念此心常若皎月遂以十月廿四日終嗚呼夫
人可謂壽康好德考壽終命矣至順壬申三月壬午葬
縣之平西鄉荊川祖塋之兆夫偏愛其子者婦人之情
也袁氏舍己所出以樹他母之廢子所樹者死又培植
其曾孫而完其家禍患摧輒之餘終始一致非有烈大
夫之風乎嗚呼賢矣汝錫靜厚通朗于孔氏之學皆有

得焉制授餘杭之龍德通仙宮提點住持鐫之子曰澤
之明陰陽五行之奧為吳興教授曰某曰某皆業儒曾
孫立中等皆向學汝錫以狀來言曰吾隱約山林且老
矣懼無以著吾母之賢于後世也幸憐而銘之泣下霑
襟銘曰

甚矣古道之蕪也世有為士而非夫也羅氏之母迪道
弗遷相其高風其女士之賢也

賈治安墓志銘

昔金源氏之亡也開封賈氏南遷江淮之間諱宗政之子曰達為宋荆襄兵馬統制官達生斗南當至元內附時以才學選為陝州路儒學教授仕至太湖縣主簿贈從仕郎汴梁路開封縣尹婉汪氏封宜人子四人仲曰策字治安狀貌豐偉美髯鬚溫厚而閎敏父甚愛之父歿悉推家貲與兄弟遂如京師見貴人之嘗學于其父者貴人見治安負雅器善為歌詩又通國字語言大嗟賞之太宗正府籍姓名以為從事會湖廣行省右丞相

額琳沁公新拜命見之喜曰吾故人子也遂用為湖廣
省宣使安南遣使入覲行省以治安將之使喜為辭章
意文事非宣使所長頗易之屬大寒安南使怪治安能
寒治安因以詩荅韻致清婉而尊中國之體寓焉使驚
服不敢復言詩時清河元文敏公在中書為參議得詩
甚喜延祐三年從布呼齊平章討廣西平義靈川賊
能以才譖自見乃沿檄軍帥討南海感德縣諸賊據高
望高院二山之險以抗官軍俄師斃于流矢重兵屯賊

境無所統馭治安即日代領軍政遂分兵守要害繕營壘嚴巡邏趣餽餽圍賊高望而高院賊率千餘人突來督兵擊却之明年平高望賊酋餘黨猶負固矢石如雨治安神色不撓急攻破之乃趣大校合兵攻高院賊敗又柵險印村則攻拔其柵羣蠻散走山谷間官軍欲來勝殲焉治安不可亟宣赦令招降之此其平生著勞之表表者也武昌金沙州善崩數為民患治安監治之民至今賴以無役海北海南琛舶之稅入于官者所司屢

請賣之蓋欲以賤直入官而厚利以自封也先是以省
檄往視者率受賂還且為之辭及治安往賂錢數萬緡
皆不受盡以雜貨送之省六年入為京畿倉使明年丞
相治諸倉出納之為姦利者責倉官庾虧儲往往鬻妻
子或投水飲毒藥死獨治安所儲米贏二千餘石朝廷
嘉之并以戰多超一資至治元年為紹興之西興場鹽
司令時兩浙轉運使王公都中以竈戶有恒賦而貧富
之不恒也久矣乃俾官屬行諸郡更定之治安行四明

天台諸場至則集其人而告之曰竈戶之獎極矣產與賦久不相侔民窮且死富者猶任輕賦而使窮且死者任其重忍乎爾曹相與居鄉里戶高下所素定者今與若約產多者上坐餘以次占席賦以是為差既坐各著于籍而退不擾而賦平人有圖其像而事之蓋感之至也至順二年同知餘姚州事與長吏協恭以成其政外若無所為而民實受其惠至元再元之四年以承直郎為杭之仁和縣尹仁和劇縣也諸大府臨其上俯仰奔

走有非其志者矣明年四月疾作遂致其事竟以五月
十三日終年五十八天性孝友歲時思其父母輒嗚噎
流涕弟兄散處南北每相見慟哭而後別見人困苦者
必賑恤之朋友死生之託尤盡其誼中歲雖不欲仕喜
與客徜徉山水間賦詩以為樂居西興時有賈公墩舒
嘯亭鶴死而瘞之則為鶴冢亭所居以悠然名齋常慕
陶彭澤之為人年未六十以邑令終此其徵歟是年八
月庚寅葬錢塘履泰鄉仙芝里之原詩文若干卷藏于

家娶真定張氏封宜人治安好客四方之賢士多集其門俸入不足以治具宜人至脫簪珥繼之子男三人長曰芝雅飭而有文張所出也次曰葵曰艾孫男曰宜芝等向余拜且泣曰先人墓石願先生銘之嗚呼余知治安久矣為仁和時又與余居同里巷數相過把酒談昔時所為益有志于用世者也以董戎治粟定賊賦數事與其好賢樂善憫人窮之心而觀之若宜世之載顯位食厚祿者乃抑鬱不得伸其志以死銘曰

世有駢驥乃服鹽車鳳凰高飛而居以斂孰不自奮業
與位稱厥施弗張由制于命猗嗟治安器則藏矣仙芝
之阿斂而藏矣

安雅堂集卷十二

欽定四庫全書

安雅堂集卷十三

元 陳旅 撰

雜文

鄭氏譜

立法以為譜古君子之所甚重士大夫之所當知也五季之亂衣冠舊族亡其世課多失其傳系獨采河南劉睦自北齊中書侍郎

闕

至睦十一世俱可考當時皆

慕艷之浦江鄭氏自漢初至今凡五十一世不尤為可
慕者耶鄭氏諸孫銖會旅京師出進士吳棻所述圖譜
請題適旅少暇日留寘齋中者頗久今銖受命為行宣
政院照磨將歸江南因書而還之

坦齋銘

王道平平既錫汝極遵道而行乃即安宅利欲之岐車
覆馬踣孰為險夷願我攸迪小人物役自底戚戚唯幽
而貞獲履之吉

為楊友直製木笏銘

辨良材審度正手有容德之柄慎毋忽持以敬立明廷
對休命

尊已堂銘

朱文公題扁

林林生人玄精之凝自頂及踵天命流行君子之身敬
恭奉承曰惟事天動罔或輕公卿父兄出入攸事至于
使事亦若承命無所不敬尊已之謂儼然自尊反失良
貴擁金如坻高位以妖元身為侯衆怒之射匪德之尊

其尊為危所以謙者莫踰其卑先獻顓顓汪氏之軌尊
已翳何非己之已載瞻華榜思我朱子神蚪登天遺蛻
在此惟汪有孫作堂言言雲屏之山峙其後前豈構之
復訓迪厥先爾冠爾裳毋隳而天

勤耕亭銘

有序

富州民鄒福少時與人傭耕及事久監揭先生始知學
在京師久學益力能為詩又從奎章閣授經郎林希顏
學國字業成將授校官去乃來言曰吾本黎塘里田舍

子也雖竊有志四方然還里日不敢舍吾耒以嬉太常
博士趙公為篆勤耕二字扁吾草亭願得一言識之余
善福之能不遺其本也為銘曰

古者四民唯農為良烝髦于農不于工商世靡耽逸浮
末滿國乘堅策肥不稼不穡有處于民輟耕而嘆或興
于茲耻言其端民有鄒福樸野不飭曰吾世農况我傭
力我行四方我思黎塘手雖釋耒而心弗忘靈雨纚纚
黎塘多水下田種稂上田種秬福雖遠游亦時歸休痔

乃良耜飯乃大牛有屋其翼耕港則息亦有鄰叟爰憩爰食聖皇乘乾歲歲有年擊壤且歌樂堯之天

尚德齋銘

有序

汝南蔣完子成有志為學武夷杜先生名其齋居尚德孔子曰尚德哉若人謂南宮适贊禹授貶羿稟也孟子云禹稷顏子易地則皆然子成能學顏子之學則德其所尚者矣銘曰

人各有尚士尚者德德人之心衆善攸宅著之躬行則

道之迪措諸事業則物之澤窮而顏淵達乃禹稷顏何
人哉我則矜式曰高必躋曰遠必適彼言亦言彼服亦
服始闢其門終造其域德崇于身人反我則吾銘匪躬
願子毋斁

恭跋文宗皇帝御書保寶二字

魏惠王問齊國之寶威王以四臣答之秦欲觀楚國之
寶昭奚恤以五臣示之庶幾周書所寶唯賢之言也監
察御史臣保寶際遇文宗皇帝于淵潛之時上為書保

寶二字賜之既臨御又識以兩璽蓋良貴者天所與人
之至寶也惟賢者為能保之于身唯賢主為能保其賢
于國御史能忘文皇所以書二字之意乎鼎湖龍去唯
弘璧琬琰天球河圖在東西序悲夫

跋孔子觀欹器圖

孔子觀于魯桓公之廟有欹器焉使弟子注水弟子挹
水而注之中而正滿而覆虛而欹孔子喟然嘆曰吁惡
有滿而不覆者哉陳旅曰中也者堯舜禹之所以授受

而孔子之所以為教者也吾于易而得敬器之象焉于中庸而得敬器之說焉于凡天地萬物之變古今人事之得失而得敬器之大觀焉嗚呼覽是圖者其戒慎恐懼以益慎其獨哉

跋吳顥書

右吳顥秀才家書一幅詩十首寄上特進大卿玄教大宗師顥樞密院判公之孫特進公之諸孫故江浙儒學提舉養浩君之子也年纔弱冠書辭溫妥典裁詩律清

麗而筆畫秀整直吳氏佳子弟也昔養浩待特進公在京師公篤意造成之俾日從縉紳先生充廣其所學自入官以至為太常博士集賢待制出董江浙文學皆綽著善譽至元再元之四年復來京師明年八月七日歿于蓬萊坊中此書與詩則其子五月廿四日在番陽寄來特進公每見此則益悲思養浩不自勝因次韻以自寫嗚呼桐絲之琴絲竹之管物之尤美者也公尚以昔之培植養浩而培植其子則養浩為不死也傳有之曰

國人稱願曰幸哉有子顗有文學能早著見若此養浩可謂有子矣亦可以少慰二老之心矣

跋蘭蕙同芳圖

昔之君子託滋蘭樹蕙以自潔而其同姓之親有曰蘭者與為薰猶不但化而為茅苴為蕭艾而已矣讀離騷者至于今傷之石田馬氏實衆芳之所在中丞公既著芳烈于當世矣元博又能自植于顏行而流清芬于薦紳之間是圖所寫蓋寓其並芳之心焉同居曠林而不

相能者亦可以少愧于此矣

書舒嚕從道詩卷後

軍中之能為歌詠者世多有之然不夸軍容之盛殺伐之勇則叙其行役之勤戰伐之苦至又以從軍為樂相與倡和以寫一時之高致要其戚欣皆不出于其身而已矣古之人以喪禮主戰勝者蓋惡夫師之為民害也非置戚欣于其身也徒知有其身而慮不及民吾見其禍之不止于為民害也天厯初兩京用兵海內幾大亂

述律公持節太行山東西戰卻秦兵之軼晉地者賦詩
百韻述當時所見而深閔斯民之厄于兵凶增歎累嘆
者甚遠也孰謂剛暴殘忍者之可以治武事哉嗚呼剛
暴殘忍之不止為民害者亦何以慮之不及遠也

跋趙待制詩

右蜀郡趙君仲禮送胥紹道庫使還蜀詩何其辭之豪
宕而音節之頓挫而慷慨也昔趙文子舉筦庫之士七
十餘家所舉皆筦庫之士何也蓋人莫難于近利而不

濡于利則賢矣文子之所舉者其亦有所試歟仲禮名位日高行當要津以進退天下之士若用其家故事則紹道到蜀人當趨裝東來離歌無乃徒悲辛乎

跋支仲元畫晉諸賢圖

晉人清虛宏達仲元可謂得其韻度者矣然當時取人先名望後實事司馬氏不佞職此之由茂弘豐功雅量在江左無與倫儼然不能用陳顧熊遠之言以革曠誕之弊安石期功絲竹士大夫習以成俗此為可惜也餘

數公皆一時名人然未免有如圖中袒跣之態君子于此有所興起而亦有所創艾云

跋牧羝圖

右漢典屬國蘇子卿牧羝圖也曷為牧羝子卿使單于不降殺之北海上言羝乳乃得歸也抱子卿而泣者誰降將李陵也陵來從三人馬五者何單于使陵說子卿而邀之也子卿所執者何漢節也夫人情至于不能堪忍者烈丈夫或亦卒動其心而變其所守子卿飢餓困

苦在荒絕無人之地十九年母死妻嫁兄弟在漢皆以
罪死此人情之至不能堪忍者而子卿則揆以大義強
忍以全其節若陵則戰敗力屈而遂降矣母死卒不復
歸漢虞常張勝謀劫單于母更殺衛律子卿實與其謀
是子卿得罪單于其情甚于陵而單于終不忍害之使
陵時特能忍不降未必見殺何至羞見子卿泣下沾襟
乎傳曰必有忍其乃有濟有志之士未嘗不三復于斯
言也雖然猶懷生死之心以事其上君子不為也予直

就陵言之亦念如陵才武而不能強忍以全其節為可惜也

跋牛喘圖

漢丙吉為丞相道逢肆闖死傷者不問見牛喘吐舌使人問之若丙吉者可謂知為相之道矣漢興蕭曹以刀筆吏為相功業著于當時君子猶惜其未學陳平決獄治粟之對幾于大體然但出一時權譎實未得為相之道其他或以儒術至公卿者學皆未醇設施亡揆史氏

以丙魏並稱余觀魏相雖少嘗業儒所為頗近文法吏
無儒者氣象古雖起決獄小吏知學詩禮通大義及為
相能以變調陰陽為已責考其平日凡所為蓋有三代
大臣之遺風焉嗚呼世俗所謂儒與吏也往往互相詆
訾遂判為兩途孰謂魯獄吏之有丙少卿者乎三代之
時不聞以吏名者周官九兩雖有曰儒曰吏之目蓋儒
之所業即吏事也後世所謂吏者吏而已矣嗚呼孰謂
魯獄吏之有丙少卿者乎

跋五湖圖

右扁舟五湖圖五湖卽太湖別名太湖洲渚多芳草佳
樹遠岫如畫陶朱公扁舟容與其間與之越國不足易
此樂也世俗所謂滅吳之後載西施以游畫者往往畫
公與西施相對予按史記只稱公將私徒屬浮海而已
無載西施事至唐時揚州杜書記始作詩倡為此說何
其厚誣長者如是哉往年予嘗以詩辨之曰美里人去
嬖女來帝辛飲酒沙丘臺酒闌不但天智燬小白旗竿

血花紫會稽凜凜吳日驕少伯乃是師閔天姑蘇臺下
箭如兩艷骨應成館娃土當時此詩出識者謂能為古
人解紛厚之道也此圖唯畫公船頭置樽酒意度閒遠
船窗中著數卷書而已此決非世俗畫工所能作其知
范公者哉

道藏經跋

荀卿子以人心之危道心之微為出于道經則古之所
謂道經蓋儒書也司馬談所習于黃子者則異于此矣

然余幼時常見道藏經目一卷中間多儒家古書其黃
帝老子之言固有用以治國者它如巫醫卜祝之說亦
儒者所不廢而凡棲神導氣之方則又遺世獨立之士
得以善其身焉故崆峒邵氏亦嘗傳參同而深有取遠
游者之言也然則道經亦世之所不可缺者廬陵真常
觀道士李俊迪刻道藏經若干卷以廣其傳可謂勤于
其道又足以備夫世之有取焉者吾黨善其所為而旌
德縣尹劉性為徵余言識卷末云

跋東坡帖

先生平生風節與夫出處欣戚之槩可以見于翰墨之間矣海會寺所寫及陌上花皆熙寧六年八月廿日作陌上花無鏡削之迹亦以見當時人心有不可奪者南華寺齋僧疏讀之令人流涕使先生至于如此者真無人心者也旅嘗憶外大父浚儀趙公之言謂張天覺好佛人所不與陳忠肅公亦好佛君子未遑議之蓋以其大者之皦皦于當世也人不能學魯男子之不可而欲

為柳下惠之可可乎三復是卷深有感于斯言因併及之

跋段氏庸音集

文章貴奇崛而忌奇崛尚平易而厭平易古之作者辭淡而旨醇貌直而思婉聲約而韻充閭巷刺草之言被之箎絃可以感人心召和氣而易風俗音之庸也蓋謂庸非奇崛非平易天下之常言雖聖人不能易也旅曩嘗有志于是學道弗明故其為言不失之奇崛則失之

平易卒不足有聞於人而今且衰矣吾友段君吉甫出
視其詩文若干首題曰庸音繙繹數四見其筆勢翩翩
率迪古作大篇短章典實奇秀私欲易其一字而不能
于是知是編之所以為庸而其自序以為凡近淺易者
謙言也傳曰清廟之瑟一倡而三嘆吾懼夫世之知庸
音者蓋鮮矣不然吉甫豈擢高科而何其久于外也朱
絃疏越尚往鳴天地之和于清廟之間乎

跋松廳章疏

前代有諫官有察官其任皆重也我朝唯設監察御史而諫官之責寓焉則御史實有兩重任矣然居是官者往往致詳于六察匡諫之道則或未盡至于為天下后世計而出于尋常識見之外者蓋益寡矣趙郡蘇公伯修為御史中臺僅四閱月而所上章疏已四十有五言當畏天變奉宗廟保聖躬輔聖德止畋獵大臣不當增廣居第凡政治之未善民隱之未恤風俗之未正賢者之宜進而未進不肖之宜退而未退者皆言之道足以

事明主氣足以肅羣慝學足以達古今之變智足以周天下之慮若公者可謂能任夫兩者之重也中間又嘗以延平李先生從祀為請于世教蓋拳拳焉嗚呼為御史而念及乎此是豈易與尋常識見者言哉

跋楊九思字說

洪範五事曰貌言視聽思以五行而言思土也能君乎貌言視聽其功至于庸作聖則思之于人大矣故孔子于視聽色貌言事疑忿得九者皆以思言而立教視洪

範為加密者謂自吾身以至接于事物皆不可以不思也楊定省字九思玄教大宗師吳公告以孝親進德之說善矣蓋孝者百行之本學本于親乃可以進德而思者所以致知以為行之之地也九者而有不思則視或不明聽或不聰色或不溫貌或不恭言或不忠事或不敬疑或不問忽將及難得有非義如是則必至于行虧而身辱不得謂之孝矣是故君子于一言一動之微皆慎思之以為欲保吾身以事親也如之何勿思

跋危太樸所藏曾王虞三公詩文

右曾文定公擬

闕

臺記王文公詩奎章閣學士虞公所

製文定祠記三者又皆虞公手書虞公蜀人今家臨川
文學與曾王兩公相望而此卷實具有之嗚呼美矣太
樸宜與曾氏子孫求貞石使吳中石工併刻之臨川有
榮觀焉

書虛舟說後

鎮陽趙時中氏以燕處之室為虛舟則非莊子之所謂

虛舟矣蓋是舟非以無主為虛而虛以為之主也人之
一心可以載萬物而不可以有一物有一物衡于其中
則物莫能入矣古之君子能任大事濟大難而不自有
其功者虛以為之主也夫通天下之不通者莫如舟易
之咸極言感通之道曰憧憧往來朋從爾思言累于私
感則不足以及遠故孔子傳大象曰君子以虛受人是
虛也非謂無主也無私吾以為之主則所受者大而所
感者無不通矣時中器弘而識達操固而慮審將以其

身為舟以濟夫世之不通者豈若漆園傲吏之漠然于當時哉

書李氏遺安堂記後

君子無往不安不能安則雖田野里巷之間皆危地也
龐公以隱退為安是果足以遺子孫乎車不覆于羊腸
而覆于康莊之衢安危不繫于地尚矣旅聞君子之學
至于安而止也學至于安則窮達出處無不安矣然則
人能教其子孫使致力于學不謂之遺以安乎李氏祖

父皆以詩書傳家唐卿蚤以才學見用于觀又以明經
領薦書則李氏之遺其子孫者以學安之道在是矣故
雖載高位登要津皆安所也龐公烏有是哉嗚呼君子
豈獨遺子孫以安蓋將推之以遺天下之人此又名堂
者之微意也歟

書野鶴記後

述津從道世家遼東鶴其邑名人野故以是號之遼東
之鶴鶴之仙者也千百六歲則能與鳳凰遊于聖人之

旬鶴野不專在遼東矣從道以清貧之資而學兼文武
雖董戎西南終當羽儀天朝以大展布其所學則所謂
鶴野其在聖人之旬乎詩云鶴鳴于九臯聲聞於野釋
者謂誠之不可掩也從道之所蘊者著于朝久矣

瑞瓜解

在金陵作

相國涼公既謝事完江壩園有異瓜合跌歧顛續師象
容薦紳傳觀頌聲泚泚東篋西壩客有獻疑于陳旅曰
在昔三公論道位尊期頤變元化于重几暢嘉生于九

園今公望老引却邈乎化機故所及者弗溥而近發于
畦蔬之微吾黨所宜興慨顧奚喜而頌為旅解之日噫
子何錄細而遺大燭外而暗內徒知是瓜為梁園之珍
不知涼公乃希代之瑞徒知公之及夫物者在乎用舍
不知公之鍾于身者無繫乎進退夫天以清明冲融之
真篤生偉人禮陰樂陽緯義經仁肅物為秋煦物為春
雖迹離要達手揮巨鈞人唯知有元老之在天下蓋盛
德自足以長于斯民譬之寶玉在山而草木潤豈必皆

用為琮璧祥雲在空而年穀登豈必皆用為雨澤況公
在廷閣載中百運際黃道唐行臯授憲綱政條半出較
畫則其所及容有紀極乎哉觀其展采臺端抨擊醜惡
俄與羣良嬰釁羅厄公裏至和戾氣弗敵獨能綿三朋
之壽衍上公之祿怡高情于幽曠玩生意于莠植向之
之妖榮怪艷使人眩愕不敢仰覲者安知不化為飛埃
浮土于今日樊圃之側乎然則公之為瑞也蓋特秀而
靡凋百挫而莫折其所存者如是則其所及者又何可

以尋常尺寸而度絜之也至若富媼効

閩

華滋綠

玉五珏聯于蔓絲此則感應之餘徵耶以表吉人之幽
栖咸以為休禎專著于茲則公之德符僅與唐之董混
成并閩而共蹊哉言既客起謝曰僕誠小人不知君子
之事微子疑將疇稽

猫雀圖說

客有謂余曰人之畜猫以其能斃鼠也天子大蜡八猫
得與先嗇並祭詩人夸韓子之富亦曰有猫有虎蓋以

二物皆足以衛農畝爾猫而捕其雀其職之失乎余曰不然行露之詩有穿屋穿墉之喻雀與鼠蓋同類也彼鼠也雖盜吾穡猶晝伏夜動貪而畏人雀則白日羣飛喧阗相呼啄秋田之粒莫之孰何世之人恒致察于耳目之所難及恒忽焉于耳目之所易知姦貪之人人專治之則有不得肆其惡者惡不嫉于人而人實羅其害者常漏夫羅氏之羅襦也子母以吾狸奴為失職也作猫雀圖說

上趙平章書

有談天者與旅言曰天之生大賢不數其有所靳於世乎旅曰不然天之生賢猶農夫之治穡事也地力不更休不足以茂嘉穀山川清淑之氣積之不厚不足以生大賢天至仁也寧不欲數生大賢以惠斯道顧亦有所甚難者矣天唯知其生之難也故必有所為而後始慎生之夫唯有所為而慎生之則于若人也必拳拳焉保持衛翼雖或不幸有鉅禍劇厄而終不致有毫髮之傷

之傷乎旅于是益知天之生大賢其必有所為而然矣
今上入定國難既鋤姦孽乃收召老成相與更張化弦
運續和氣于是起公貳外御史府尋復召拜中司遂陟
近輔俾為二三大臣夙夜寅亮天工規復中統至元
之治以馴致唐虞三代之盛天有所為而生公者不在
茲乎不在茲乎其可不思天之所以生公與夫所以保
持衛翼之意乎閣下道德位望足以師表百僚天下事
蓋有不可得而巽其責也嗚呼古之人有有為之才恒

有能宣揚教化以表率之者乎昔之為京兆者稱趙張
三王夷考其迹有善為鈎距以得事情有越法縱舍輔
以經術有文武自將剛直守節有功無可紀而人安之
五人者其迹不同而皆以能名今之尹大興者宜于何
取法耶雋不疑黃霸孫寶之流皆知名當世不得列于
五人之間何邪其所為亦有可師者邪然漢于京兆委
寄之專使人人得其條教以自致其力今可使為大興
者如漢之為京兆者耶然專任人而不任法則民有受

其虐者矣端任法而不任人則中材以下救過不給又何暇誅繩墨之外哉若之何任法而無拘牽之弊任人無縱恣之虞人得盡其才法得達其用使首善之地治效彰著以表儀于天下班固所謂在彼不在此者亦可得而言之乎願聞其說

甯節婦傳

甯節婦者故太尉魏國甯武宣公之子婦也公孟州河陽人材勇善騎射至中從淮安忠武王平江南有功朝

廷以吳門為江海要衝俾以其軍鎮吳因即居之公保境輯民子孫世食其德第三子曰居賢為樞密院院斷事官娶通吉氏通吉氏肅慎右族總管揚州路禮之女所謂甯節婦也延祐初斷事公卒于官通吉氏方盛年子女皆幼自京師扶柩數十里還葬河內通吉氏抱孤兒舍墓下三年還吳遂不復設簪珥美服于其身每痛自念曰吾為甯家婦不得事吾夫以老吾猶能使子有立女有從甯氏之祀弗墜舍是吾無所事于世矣乃身

卷十三
匹福之良也甯公客死子幼其家之存幾何一乳嫠砥
節勵行遂扶樹其已危而終存用貞白之風振衰末之
俗則又不但能存甯氏而已君子于此其亦有所感夫
九齡嘗從予學九思之子曰矩

節孝段氏傳

保定易縣魏德義之母段氏年十六歸于魏生德義三
歲其夫從軍伐宋攻襄樊襄樊城堅不即下朝廷調兵
急魏與段訣曰親老子幼而吾寄身矢石之下即不從

而其父母卒安樂以壽終子孫衆多而其家日殷豈非
段氏能為魏氏之福乎

三孀傳

相人李柔母陳氏夫歿時年方盛誓不食他姓常自念
曰吾舅姑老而哭子曷為而使之無傷其心乃日夜務
女紅為養家有無不使之知舅姑曰婦吾子也吾子不
死也遂皆安樂以壽終附于身附于棺者皆無有悔焉
陳氏子長某次柔柔兄早世嫂王氏年廿四無子鞠前

婦子如已子義如其姑王氏有女嫁未幾亦寡義如其
母里人遂稱為三孀云陳先生曰夫死不嫁人道之常
無足異者後世于千百之中得一二焉于是任風化之
責者表而異之以為千百人之勸而媮風不衰也三孀
出于一家則千百中之所絕無者矣變風十三國獨衛
共姜有自誓之詩而其言曰母也天只不諒人只共姜
之母非所以為教矣然則李氏婦姑子母之美其可不
稱道哉

以相知之深相好之篤而然歟旅嘗病夫近世有儒者
詩人之分也深于講學而風雅之趣淺厚于賦詠而道
德之味薄要非其至焉者其至焉者無儒與詩人之分
也先生沈潛載籍大而聖賢心學之蘊細而名物度數
文字句讀音義之詳靡不究極隱居終身不以自外至
者易其素守計其平日之所以用其心者殆若未遑他
及而此詩冲澹醒藉音節跌宕而興致高遠乃若專久
于為詩者是豈可以向所謂儒者目之哉其庶幾吾之

試為我言請之數乃與之言曰嘗聞民受天地之中以生所謂命也仁義禮智者中之物也以是命我者天也以是與我者亦天也天職盡矣我獨無所事乎昔余見鄰富人以田宅財貨與羣子旦日坐堂上教之曰若有田則不飢有室屋則不露有財貨則不匱吾非一日得之以與子也旦日又教戒之余別去十數年還過其家則羣子者大半貧不自存問其存者則曰吾父所與非不厚且有也吾能保之兄弟不能保也吾父能與之不

能使之有也余因念人之得于天者初無同異而終有
聖賢愚不肖之異者亦若是矣夫天下之物可以與我
者則强有力者皆得而奪之彼富人子或亦不學而自
奪也吾仁義禮智無有封守人莫能取再拜而獻諸强
有力者彼且不受吾唯懼夫物欲之內賊甚于世之為
奪者矣人莫能取者自舉而棄之卒為愚不肖而不怪
者也然則天與我矣我果無所事乎蓋士貴乎講學學
貴乎慎獨講學則明于義利之辨慎獨則致謹于其幾

焉吾之所以辨義利而謹其幾者所以保吾有也孟子
曰庶民去之君子存之生母但曰天與我矣獨不見吾
鄰富人之羣子乎

徐仲同字說

浮光徐君復初之從子曰察靜惠而好學復初屬余字
之余字曰同又屬余為之說以告之余惟察之為學也
固將入官以行之也然事有不可以獨任而智不可以
自用也故國家設官有寮案焉蓋欲使居官者同用其

智而同仕其事也夫衆力之所至則無重之不舉衆慮之所及則無隱之不周人不吾與也者吾言未公也吾與人忤者人心未孚也狹量不足以處衆偏見不足以燭理固執不足以達務天下有大同之道固吾衆人之所共趨者也同乎同乎其居官者之善物乎雖然同亦有二義有不同之同焉有以同為同者焉不同之同孔子謂和而不同者也以同為同則晏子之所以議梁丘據也易不云乎同人于野亨又不云乎出門同人先咎

案之所以為同者宜亦進于此哉宜亦進于此哉

沃呼允常字說

肅慎望族之家于浴者曰沃呼氏今祕書典簿曰海壽
者英敏沈毅遠大之器也嘗過于余而有請曰海壽幼
歲備宿衛未幾而先人即世弱冠又備官使今年廿有
六矣以幼孤又出入奔走無寧日故宿賓命字之禮闕
如夫字以敬名也敬名所以責成人也子宜圖之余辭
不獲乃與其所雅敬者謀所宜字皆謂宜字允常又皆

長矣願先生賜之字余謂生之名其取諸易之復乎復之初九曰不遠復元祇悔元吉孔子釋之曰顏氏之子其殆庶幾乎有不善未嘗不知知之未嘗復行也夫自姤至剝剝極為坤則為陽矣一陽復于下斯為反善之義而復之最先者故不至于悔大善而吉也學者能省察于一念之微以求復夫本然之善是謂觀復顏子之所以為顏子者亦若是而已字生為師顏可乎觀復再拜受教余曰未也孔子又嘗以克己復禮告顏子矣克

已復禮乾道也復之陽即乾之陽不遠復即克已復禮之復由一陽之復以至于純乾此顏子為仁事也觀復其師顏哉

為蔣師父作思勉說


學必思于心而勉于為二者恒相須也然非澄靜不能思非堅久不足言勉蓋思以汨亂之心則所思者謬勉以狂銳之力則其勉也有時而衰矣生嘗往觀夫流泉乎其出也潏潏而有緒類乎思其奔迸于崖石窘束之

間勢不可遏類乎勉至于達而為長川瀦而為大澤浩
乎其往也淵乎其止也則不見有所用其力焉君子之
為學不亦若是乎哉生歸當日從杜先生游武夷溪上
試指流泉以吾言質之

大都海子橋火德廟疏

火政行四時祭已嚴于周禮陽氣彌六合祠豈繫乎商
丘騰國都之所崇宜廟貌之有赫故必增廣舊制妥寧
大神使處守者有以栖其身而禱禳者得以布其武銀

崇晚居中司益厲高風謹言或違去如蜚鴻琴冊几杖
丘園從容公齒雖暮顏如冬松尚需安車太行之東來
朝來言以廣帝聰天不憖遺條焉告終縉紳聚哭莫啟幽宮
某追念曩歲游于辟雍公獨惠愛牖其顛蒙乃今粗成
敢昧所從顧瞻覃懷寒雲濛濛爰致泂酌以寫悲恫



安雅堂集卷十三